

ҰСТАЗ. ӨНЕРПАЗ. ТҰЛҒА.

М.Әуезов атындағы Оңтүстік Қазақстан университетінде «Ұстаз. Өнерпаз. Тұлға» атты ардагер-ұстаз Күліш Төлеуханқызының 75 жасқа толуына орай шығармашылық әдеби кеш өтті. «Білім беру ісінің үздігі», «Республикалық іскер әйелдер ассоциациясының», «Республикалық мұсылман әйелдері лигасының» мүшесі Күліш Төлеуханқызы білім саласында 50 жылдан астам еңбек еткен ұлағатты ұстаз. Іс-шараға Шымкент қаласы мәслихатының депутаты Жанар Бектаева қатысып, ұстазды мерейтойымен құттықтады.



– Әнге деген өнерім – Күләш апам, Манарбек ағам сияқты әншілер туған Ақтоғайдың киелі топырағынан, ал ұстаздық жетістігім 50 жыл ұстаздық еткен әкем Төлеуханмен, шапағатпен шарапаттың нұрын себуші әкемнің інісі Сламия Саттарұлынан, аяулы ұстаздарым Игісін Садуақасов, Өзбек Нұржанов, Төлтай Мақсұтовтардан дарыды. Саналы ғұмырымды балалармен өткізіп, олардың тәрбиесі мен біліміне арнағанымды өзім мақтан етемін. Шәкірттерімнің әрбір жетістігі менің көңілімді марқайтып, қуанышқа бөлейді – деді К.Төлеуханқызы.

Күліш Төлеуханқызы жас кезінен бастап өнерді қатар алып

жүріп, «Ақтоғай халық театрының» құрамында бірнеше концерттік бағдарлама жасап, 10-нан астам сахналық пьесаларда басты рөлдерді сомдаған.

Ұстадың шығармашылық кешінде ұлттық құндылықтар насихатталып, тәрбие мен тағлымға толы болды. Білім беру саласы мен өнерді қос қанатындай қатар алып жүрген ұстаз – шеберлігімен ғана таң қалдырып қоймай, күміс көмей әнші, көркем сөз ұстаы екендігін дәлелдеп, нақышына келтіре әуелете ән шырқап, көркем сөзге жан бітіріп көрерменді тәнті етті.

Г.СҮЛЕЙМЕНҚЫЗЫ